

Inatsisartut ukiakkut 2017-imi ataatsimiinneranni Naalackersuisut, aallarnisaasunut suliffeeqanillu ingerlatsisunut, aningaaserivitsigut aqputit nalinnaasut atorlugit attartorsinnaangitsunut, annikittunik taarsigassarsitsinermik ukiuni sisamani misiliinissaq anguniarlugu, Inatsisissamik saqqummiussinamik peqquneqarnissaannik aalajangiiffigisassatut siunnersuut. Misiliinerup nalaani Aningaasanut Inatsimmi ukiut tamaasa siunertamut 500.000 kr.-nik immikkoortitsisoqartassaaq. Taarsigassarsiat killilimmik annertussuseqartassapput soorlu 20.000 kr.-iniit 100.000 kr.-inut. Inatsisissatut siunnersuummi ernialersukkanik taarseraanissamik periusissaq ilanngunneqassaaq, pisortat annaasaqarsinnaanerat killilersimaarusullugu. Tamatuma saniatigut Inatsisissatut siunnersuut misileraanerup naanerani nalilersuinissamik piumasaqaammik ilaqassaaq.
(Inatsisartunut ilaasortaq, Múte Bourup Egede, Inuit Ataqatigiit)

Akissuteqaat

(Inuussutissarsiornermut, Suliffeqarnermut, Niuernermet Nunanullu Allanut Naalackersuisoq)

Aappassaaneerneqarnera

Naalackersuisut sinnerlugit Inuussutissarsiornermik Ataatsimiititaliaq isumaliutissiissutaa-nut qutsavigaara.

Isumaliutissiissut malillugu Inuussutissarsiornermik Ataatsimiititalimi amerlanerussuteqartut siunnersuummut allannguutissap uuma akuerineqarnissaa innersuussutigaat.

Inatsisinik, aallarnisaasunut aamma suliffeqarfinnut pioreersunut aningaasaqarnikkut pitsaannerusunik periarfissaqartitsinissamik siunertaqartunik, peqareerpoq. Nunami inuussutissarsiutinut tunngatillugu inuussutissarsiornermik siuarsaaneq pillugu Inatsisartut inatsisaat nr. 20, 3. december 2012-imeersumi siunertaavoq tapiisarnermut aqqissuussat atorlugit aallarnisaasunut aningaasaqarnikkut atugarisaannik pitsaanerulersitsinissaq, aallarnisaasunut suliffeqarfimminni aallartinnissamut aningaasaqarnikkut oqinnerulersitsisussamik. Inatsimmi tunisassianik ineriartortitsinissamut aamma naafferaartumik tapiiffigineqarneq, kiisalu suliniummut ataatsimut 300.000 koruunit tikillugit suliaasaqarfinnut aalajangersimasunut tapiisarnissaq ajornarunnaarsinneqarpoq.

UPA2016-imi inuussutissarsiutinik siuarsaaneq pillugu inatsimmut allannguutissaq akuerineqarpoq, taamaalilluni immikkut aallarnisaasunik ineriartortitsinermik ingerlatsisarnissamik pilersitsinissamut inatsisitigut tunngavissiisoqarluni. Aallarnisaasunik ineriartortitsinermut taamatut ingerlataqarnissamut siunertaavoq, suliffeqarfiup siuariartornissanut suliffissanillu pilersitsinissamut periarfissai tunngavissinniarlugit, piffissap ukiunik 1-2-inik sivilissuseqartup ingerlanerani

aallarnisaasut arlallit immikkut aallunneqartumik ilitersorneqartarnissaasa
tapersorneqartarnissaasalu qulakkeerniarlugu.

Tapiisarnermut aaqqissuussat, Greenland Business-imit allaffissornikkut aqunneqartut,
saniatigut Naalackersuisut ukiuni kingulliunerusuni nunaqarfinni isorliunerusunilu
inuussutissarsiornerup ineriartortinneqarnissaa immikkut iliuuseqarfigaat.
Suliniuteqarnerup taassuma ilaa kommunit qanimut suleqatigalugit ingerlanneqarpoq,
taakkumi suliniutinik taperneqarsimasunik piviusunngortitseqataassammata.

Naalackersuisut aaqqissuussat atuutereersut ingerlaavartumik naleqqussartarpaat,
taamaalillutik taakkua sapinngisamik pitsaanerpaamik aallarnisaasunut
tunngavissiissallutik.

Siunnersuut una Naalackersuisut ukiuni kingullerni inuussutiisarsiornermik
siusaarniarlutik aallartitaannut arlalippassuarnut naleqqussarneqarsinnaapput.

Naalackersuisut amerlanerussuteqartut isumaliutissiissummi inassuteqaataat tusaatissatut
tiguaat, 2018-imilu aningaasanut inatsisissami oqallisigineqarnissaa saqqummiunniarlugu,
tassami siunnersuut aningaasartuutaassammata, taamalu akuersissutigineqaruni
pisariaqartumik aningaasalersornissaa pisariaqarmat.

Naalackersuisut siunnersuut akuersissutigineqassasoq inassutigaa.